

六朝詩集

陸士龍集卷一

賦

逸民賦 并序

富與貴人之所欲也而古之逸民或輕天下細  
萬物而欲專一丘之歡擅一壑之美豈不以身  
聖於宇宙而恬貴於紛華者哉故天地不易其  
樂萬物不干其心然後可以妙有生之極享無  
疆之休也乃爲賦云世有逸民兮栖遲乎於一  
丘委天刑之外心兮淡浩然其何求陋此世之  
險隘兮又安足以盤遊杖短策而遂往兮乃枕

石而漱流載營抱魄懷元執一傲物思寧妙世  
自逸靜芬響於永言滅絕景於無質相荒土而  
卜居度山河而考室曾丘翳莽穹谷重深叢木  
振穎葛藟垂陰潛魚泳沚嚶鳥來吟仍䟽圃於  
芝薄兮即蘭堂於芳林靡炎飈以赴節兮揮天  
籟而興音假樂器於神造兮詠幽人於鳴琴挹  
迴源於別沼兮食秋菊於高岑蒙玉泉以濯髮  
兮臨濬谷而投簪寂然尸居儼焉山立導渚龍  
見在林鳳戢遁綿野以宅心望空巖而凱入明  
發悟歌有懷在昔賓濮水之清淵兮儀礪溪之

一壑毒萬物之誼譁兮聊漁釣於此澤爾乃薄  
言容與式宴盤桓朝挹芳露夕玩幽蘭眇區外  
而放志兮眷天路而怡顏望靈嶽之清景兮想  
佳人於雲端悲滄浪之濁波兮詠芳池之清瀾  
鄙終南之辱節兮躋伯陽之考槃眊清霄以寄  
傲兮泝凌風而頽歎玄微載晏何思何欲漂若  
行雲之浮泊若窮林之木客有得之必喪兮蓋  
居隴之名辱彼貪夫之死權兮固遺生以要祿  
竦戰兢而履冰兮祗肅懷以臨谷亮據鼎之無  
慄兮在顛沛其必渥是故夫形瑰者徵各體壯

者爲犧雖明文而龍藻兮終俛首而受羈立修  
名於禍始兮登全生於戾階資朝華之促節兮  
抱千載之長懷擠考終於遠期兮顛靈根而自  
摧殉有喪之假樂方無身其孰哀美達人之玄  
覽兮邈藏器於無爲物有自遺道無不可萬殊  
有同齊物無寡並家於國等朝于野榮在此而  
貴身兮神居形而忘我欽妙古之達言兮信懷  
莊而悅賈憎旣明於天爵兮何憒於人禍陋國  
風之皇恤同明括於夔雅亂曰乘白駒兮皎皎  
遊穹谷兮藹藹尋峻路兮崢嶸臨芳水兮悠齋

繁丘園兮暇豫翳翠葉兮重蓋瞻洪崖兮清輝  
紛容與兮雲際欲凌霄兮從之恨穹天兮未泰  
詠歡友兮清唱和爾音兮此世

歲暮賦

并序

余祇役京邑載離永久永寧二年春忝寵北郡  
其夏又轉大將軍右司馬於鄴都自去故鄉荏  
苒六年惟姑與姊仍見背棄銜痛萬里哀恩傷  
毒而日月逝速歲聿云暮感萬物之旣改瞻天  
地而傷懷乃作賦以言情焉

夫何乾行之變通兮昏明迭而載路羨飛轡之

遠御兮騰六龍於天步時赴節而漸流兮氣移  
數而改度揮促節於短日兮振脩策於長夜運  
攸忽其既周兮歲冉冉而告暮變棘心之柔風  
兮滋豐草之湛露玄暉邈以峻服兮黃裳皓而  
振素於是顓頊御時玄冥統官天廟既底日月  
貞觀淪重陽於潛戶兮嚴徵積陰於司寒日回  
天以減景兮飈衝淵而無瀾堅冰涸於川底兮  
白雪隕於雲端普區宇之瘁景兮頻萬物之衰  
頽時稟戾其可悲兮氣蕭索而傷心淒風愴其  
鳴條兮落葉翻而灑林獸藏丘而絕迹兮鳥攀

木而栖音山振枯於曾嶺兮民懷慘於重襟寒  
與暑其代謝兮年冉冉其將老豐顏曄而朝兮  
玄髮祭其夕皓感芳華之志學兮悲時暮而難  
考遠圖逝而辭懷兮密思集而盈抱羨厚德之  
溥載兮嘉豐化之大造恨盛來之苦晏兮悲衰  
至之常蚤指晞露而怵心兮衍死生於靡草蒙  
時來之嘉運兮遊上京而凱入委乘輅於紫宮  
兮剖金虎而底邑憑台光之發暉兮荷寵靈而  
來集望故疇之迥遼兮沂南風而頽泣長難息  
而永懷兮感逝物而傷悲哀年歲之攸往兮伊



行人之思歸結隆思於朝日兮綴永念於紀暉  
表寸陰而貞吝兮盼盈尺其若遺嗟我行之久  
永兮何歸途之芒芒懃遵渚於川盼攸逝兮江  
湘處孝敬於神丘兮結祗慕於帷桑瞻山川而  
物存兮思六親而人亡問仁姑而背世兮及伯  
姊而淪喪尋餘蹤於空宇兮想絕景於遺堂悲  
山林之杳藹兮痛華構之丘荒靖深情以遐慕  
兮思纏綿而懷楚涕垂頤以交頹兮哀凌心而  
洞駭神尋路而窘逝兮形頹感乎其所心悠悠  
其若懸兮音既絕而復舉悲人生之有終兮何

天造而罔極仰悲谷之方中兮顧懸車而日吳  
百年迅於分嗟兮千歲疾於一息詠大椿之萬  
祀兮同蟪蛄於未識歲難停而易逝兮情艱多  
而泰寡年有來而棄子兮時無算而非我祇生  
心於日順兮雖呼翕其難假攝僦生於逆旅兮  
欲淹留其焉可彼鑿寐之有時兮亦始卒之固  
然舒遠懷於千載兮悵同感乎中山鑿通人之  
炯戒兮懼晏平之達言啓貞心以自買兮覽遺  
籍而問道亮爽鳩之旣徂兮故營丘之有紹在  
吾儕之陋心兮豈取樂於東表苟長生而自得

今將奚待而有天考大德於天地兮知斯言之益矯

愁霖賦

永寧三年夏六月鄴都大霖旬有竒日稼穡沉湮生民愁瘁時文雅之士煥然並作同僚見命乃作賦曰在朱明之季月兮反極陽於重陰興介丘之膚寸兮墜崩雲而洪沉谷風扇而攸遂令苦雨播而成淫天決漭以懷憐兮民嘖感而愁霖於是天地發揮陰陽交烈萬物混而同波兮玄黃浩其無質雷憑虛以振庭兮電凌牖而

輝室雷鼎沸以駿奔兮潦風驅而兢疾豈南山  
之暴濟兮將冥海之鬱溢隱隱填填若降自天  
高岸渙其無岷兮平原蕩而爲淵遵渚回於凌  
河兮黍稷什於中田匱多稼於億庾兮虛夙敬  
於祈年外薄郊甸內荒都城陰無晞景雷無輟  
聲纖波靡於前途兮微律隔於峻庭紛雲擾而  
霧塞兮漫天頽而地盈於是愁音比屋歎發屢  
省陽堂乏暉朗室無景望曾雲之萬仞兮想白  
日之寸脛感虛無而思深兮對寂漠而言靖毒  
甚雨之未晞兮悲夏日之方永瞻大辰以頽息

兮仰天衢而引領愁情況疾明發哀吟永言有  
懷感物傷心結南枝之舊思兮詠莊舄之遺音  
羨弁彼之歸飛兮寄予思乎江陰渺天末以流  
目兮涕潺湲而沾襟何人生之倏忽痛存亡之  
無期方千歲於天壤兮吾固已陋夫靈龜矧百  
年之促節兮又莫登乎期頤哀戚容之易感兮  
悲懽顏之難怡考傷懷於衆苦兮愁豈霖之足  
悲雲曇曇而疊結之兮雨淫淫而未散晞朱陽  
於崇朝兮悲此日之屢晏効豐隆於岳陽兮執  
赤松於神館命雲師以藏用兮繼乘龍於河漢

照濛汜之清暉兮炳扶桑之始旦考幽明於人  
神兮妙萬物以達觀

喜霽賦

余既作愁霖賦雨亦霽昔魏之文士又作喜霽  
賦聊廁作者之末而作是賦焉

毒霖雨之掩時兮情懷憤而無憚肅有禱於人  
謀兮反極陰于天律靖屏翳之洪隄兮戢大山  
之觸石凌風絕而謐寧兮歸雲反而揮霍改望  
舒之離畢兮曜六龍於紫閣揚天步之剡剡兮  
播靈輝之赫奕於是朱明自皓凱風來南復火

正之舊司兮黜后土於重陰夷中原之多潦兮  
反高岸於嵩岑萎禾竦而振穎兮偃木豎而成  
林嘉大田之未墜兮幸神祇之有歆爾乃俯順  
習坎仰熾重離兼明暢而天地曄兮群生悅而  
萬物齊魚凌淵以增躍兮鳥林而朝濟戢流  
波於枉水兮起芳塵於沉泥朱光播於甕牖兮  
素景衍乎中閨天監作照幽明畢覲普厥有懽  
覃及四國翕萬情而咸喜兮雖無獲而自得災  
未及周和斯有祥翼翼黍稷油油稻糧望有年  
於自古兮晞隆周之萬箱原思悅於蓬戶兮孤

竹欣於首陽陰陽交泰萬物方道炎神送暑素  
靈迎秋四時逝而代謝兮大火忽其西流年冉  
冉其易頽兮時靡靡而難留嗟沈哀之愁思兮  
瞻日月而增憂感年華之行暮兮思乘煙而遠  
遊命海若以量津兮吾欲往乎瀛洲臨儀天之  
大川兮凌懷山之洪波瞻增城之峻極兮仰蓬  
萊之崑峨望王母於弱水兮詠白雲之清歌雖  
嘉命之未錫兮將輕舉於流沙振仙車之鳴鸞  
兮吐玉衡之八和託芝蓋之後乘兮飡瓊林之  
朝華修無窮以容與兮豈萬載之足多



登臺賦 并序

永靈中參大府之佐於鄴都以時事巡行鄴宮  
三臺登高有感因以言崇替適作賦云

承后皇之嘉惠兮翼聖宰之威靈肅言詞而述  
業兮乃啟行乎北京巡華室以周流兮登崇臺  
而上征攀凌砥而遂濟兮迄雲閣而少寧爾乃  
佇眄瑤軒滿目綺寮中原方華綠葉振翹嘉生  
民之疊疊兮望天晷之苒苒歷玉階而容與兮  
憩蘭堂以逍遙蒙紫庭之芳塵兮駭洞房之廻  
飈頽嚮逝而逆物兮傾冠舉而凌霄曲房縈而窈

眇兮長廊邈而蕭條於是迥路季夷邃宇玄芒  
深堂百室曾臺千房闢南窓而蒙暑兮啓朝牖  
而履霜遊陽堂而冬溫兮步陰房而夏涼萬禽  
委地於潛室兮驚鳳矯翼而來翔紛譎譎於有  
象兮邈攸忽而無方于時南征司火朱明鬱遂  
縣車式徐曜靈西墜暑乘陰而增炎兮景望淵  
而曖昧玩瓊宇而情歔兮覽八方而思銳陋雨  
館之常規兮鄙鳴鵠之蔽第仰凌眄於天庭兮  
俛旁觀乎萬類北溟浩以揚波兮青林煥其興  
蔚扶桑細於毫末兮崑崙卑乎覆篲於是忽焉

俛仰面天地既必宇宙同區萬物爲一原千變  
之常鈞兮齊億載於今日彼區中之側陋兮非  
吾黨之一室本達觀於無形兮今何求而有質  
於是聊樂近遊薄言儻佯朝登金虎夕步文昌  
綺䟽列於東序朱戶立乎西廂經蕤擘以披藻  
兮椒塗馥而遺芳感舊物之咸存兮悲昔人之  
云亡憑虛檻而遠想兮審歷命於斯堂於是精  
疲遊倦白日藏輝鄙春登之有情兮惡荆臺之  
忘歸聊弭節而駕言兮悵將逝而徘徊感崇替  
之靡常兮悟廢興而永懷隆期啓而雲升逝運

靡其如頽長發惟祥天鑒在晉肅有命而龍飛  
兮跚重斯而肇建嘉賓魏之欽若兮鑒靈符而  
告禪清文昌之離宮兮虛紫微而爲獻委普天  
之光宅兮質率土之黎彥欽哉皇之承天集北  
顧於乃眷誕洪祚之遠期兮則斯年於有萬

南征賦

并序

太安二年秋八月奸臣羊玄之皇甫商敢行稱  
亂逼乘輿天子蒙塵于外自秋徂冬大將軍  
敷命群后同恤社稷乃身統三軍以謀國難自  
義聲所及四海之內朔漠之表蒸徒羸糧而請

陸集  
奮胡馬擬塞而思征四方之會衆以百萬軍旅  
之盛威靈之著自古已來未之有也粵十月軍  
次于朝歌講武洽戎以觀兵于殷墟於是美義  
征之舉壯師徒之盛乃作南征賦以揚匡霸之  
勲云爾

有皇晉之霸后資濬哲之獻聖崇文德於緝熙  
濟武功而保定應天鑒之昭華荷帝祐之休命  
步玉衡以觀八方在旋璣而齊七政芒芒神道  
化洽崇深仰戾天飛俯洞淵沉振南箕以鼓物  
冒慶雲而崇蔭  
天維以籠世廓宇宙而宅心

濟博施之厚德鏗希聲之大音淵澤回而泣注  
豪彥萃而爲林九服維清諸夏謐靜肅慎回首  
沙漠引領天和時降地靈風挺結芳林之竒幹  
珍禾之神穎勵修德於億兆端澄形於萬景  
在中葉之不競遭皇家之毒亂悲國步之未夷  
仰夙興而昧且括無方而大誥集率土而貞觀  
致天屬於王畿肅有征而省難爾乃建黃鉞之  
靈威樹戎輅之高蓋伐隱天之雷鼓振凌霄之  
電旆介天揮戈而夙興輕武總千而啓萬振靈  
韶之嘈嘈飛旟旒之藹藹虹旃泝風以委虵霓

旄蒙光而容裔公徒十萬其會雲興悠悠華戎  
時罔丕承爾乃命屏翳以夕降式飛廉以朝升  
塗蒙雨而復清景帶天而光澄陪武臣於彫軒  
列名僚於後乘猛將起而虎嘯商飈肅其來應  
士憑威而嚮駭馬歛天而景凌臨川屯於廣陸  
武騎被乎中陵類禡比京師徒經始栢栢先征  
在河之渙順彼長道懸旌千里羨王師之遵時  
茂七德而發止爾乃稅駕殷墟我徒旣閑順時  
講武簿狩于原紛同功而類聚煥副翼而明分  
祇明刑以誓衆習軍政於舊聞巖山立以崇蒼

繁煙駭而興紛若冥海之引回流岱靈之吐行  
雲于時玄冬首時陰風戒煞山澤含哀天地肅  
又閉夜列以澄清中原曠而曖昧戎士肅而咸  
戒三軍紛而雜遝長角哀叫以命旅金鼓隱訇  
而啓伐景凌冥而四播音乘雲而上逝火烈具  
舉伐鼓淵淵朱光俛而丹野炎暉仰而絳天曜  
靈翁赫以增熾憤氣拂悅而凌煙狂飈起而妄  
駭行雲藹而千眠旌旆翻其猗靡驚燦因而嬾  
娟爾乃洪音雷漬問剋廣凌雲發揮萬里振  
響聲馮虛而天回烈駭而地蕩映皓月而望



舒闇照重昏而大夜朗服縣炎揚而晁儻飛烽  
戢煜而泱泱乃有熊羆之旅虓鬪之將雄聲泉  
涌逸氣風亮超三軍以奔厲賈餘勇而成壯兆  
洪音於寂漠先無形而高唱紛若屯雲渙若積  
波遁陰景靜言勿譁絕倡寂其既收萬夫翕  
而咸和嚴鼓隱而重戒景燧曄而星羅烈蒙陰  
而叩假曜憑陽而登遐若扶桑之振華葉皓天  
之散朝霞超燭龍之絕景豈比象於百華

寒蟬賦

弁序

昔人稱鷄有五德而作者賦焉至於寒蟬才齊

其美獨未之思而莫斯述夫頭上有綏則其文也含氣飲露則其清也黍稷不食則其廉也處不巢居則其儉也應候守節即其信也加冠冕取其容君子則其操可以事君可以立身豈非至德之虫哉且攀木寒鳴貧才所不空歎余昔僑處切有感焉興賦云爾

伊寒蟬之感運近嘉時以遊征含二儀之和氣稟乾元之清靈體貞精之淑質吐啾啞之哀聲希慶雪以優遊遁太陰以自寧於是靈岳幽峻長林叅差爰蟬集止輕羽涉池清澈微激德音

孔嘉承南風以軒景附高松之二華黍稷惟馨  
而匪享竦身希陽乎靈和唳乎其音翩乎其翔  
容麗蜩蟬聲美宮商飈如飛焱之遺驚風眇如  
輕雲之麗太陽華靈鳳之羽儀渚皇都乎上京  
跨天路於萬里豈蒼蠅之尋常爾乃振修綏以  
表首舒輕翅以迅翰華之墜露含煙煜以夕食  
望北林以鸞飛集膠木以龍蟠彰淵信於嚴時  
稟清誠乎自然翩眇微妙綿蠻其形翔林附木  
一枝不盈豈黃鳥之發希唯鴻毛其猶輕憑綠  
葉之餘光哀秋華之方零息鳳居以翹竦仰竚

立而哀鳴若夫歲聿云暮上天其涼感運悲聲  
貧士含傷或歌我行綠久或詠之子無裳原思  
嘆於蓬室孤竹吟於首陽不銜子以穢身不勤  
身以營巢志高於鳴鳩節妙乎鷓鴣附枯枝以  
永處何瓊林之迫儵惟雨雪之霏霏哀北風之  
飄颻旣乃彫以金采圖我嘉容珍景曜爛曄曄  
華豐竒侔黼黻艷比袞龍清和明潔群動希蹤  
爾乃綴以空冕增成首飾纓鞋翩紛九流容翼  
映華虫於朱袞表馨香乎明德於是公侯常伯  
乃紆紫黻執龍淵俯鳴珮玉仰撫貂蟬袷黃廬

之多士光帝皇之待人既騰儀像於雲闥望景  
曜乎通天邁休聲之五德豈鳴鷄之獨珍聊振  
思於翰藻闡令問以長存於是貧居之士喟爾  
相與而俱嘆曰寒蟬哀鳴其聲也悲四時云暮  
臨河徘徊感北門之憂殷嘆卒歲之無衣望泰  
清之巍巍思希光而無階簡嘉蹤於皇心冠神  
景乎紫微詠清風以慷慨發哀歌以慰懷

陸士龍集卷一

陸士龍集卷二

四言失題

前八章  
後六章

悠悠縣象昭回太素清濁迭興升降啓度遺和  
既爽季春告暮朱明來思青陽受煦

其二

日征月盈天道變通大初陶物造化爲功四月  
惟夏南征觀方凱風有集飄颻南窓思樂萬物  
觀異知同

其三

有奄萋萋甘雨未播黍稷方華中田多稼庭槐

振藻園桃阿薄言觀物在堂知化

其四

蓬戶惟清玩物一室明發有懷念昔先哲通夢  
幽人彷彿遺烈清暉在天孰與永日

其五

乃啓遺籍思予大觀幽居傲物顧景怡顏况惟  
解舞衡門重關思媚古人有懷良盤沉曦含輝  
芳烈如蘭

其六

厥初生民有物有類自古有稱大寶以位征徒

式好俊奔攸遂啓予有聞誨爾達貴

其七

達貴伊何天爵無榮渾■大昧混其濁清毀方  
道象遺頑履貞道實藏器具以昭形

其八

芒芒陋世奚兢奚錯牧彼紛華委之冲漠漂志  
垂天矯心馮閣通好莊聃儀形有作安得達人  
顧予命薄

其一

思樂芳林言采其菊衡薄遵塗中原有菽登彼



修巒在林寤宿彷彿佳人清顏如玉

其二

予美亡比誰爲適道容與俟之玄髮方皓躑躅  
山阿玩此芳草願食其穎庶以遺老

其三

亶亶嘉時飄忽棄予有瞻逝深永嘆潛滸登願  
扶桑仰結飛晷伊人匪存遺芳孰與

其四

精氣爲物或降或升緼落攸往神音有登死塋  
爲徒存亡曷勝謂予不信遺藉有徵

其五

閒居外物靜言樂幽竊樞增結甕牖綢繆和神  
當春清節爲秋天地則爾戶庭已悠

其六

嗟我懷人悠悠其潛念昔先烈有懷所欽駭情  
玩世堂允南金瓊輝邈矣誰適爲心明發興言  
忼慨芳林

征西大將軍京陵王公會射堂皇太子  
見命作此詩

芒芒太極玄化烟煜頽形成器凌象垂文大鈞

造物庶類群分先識經始實綜彛倫

其二

惟岳隆周生甫及申天監在晉祚之降神邈矣  
遐風茂德有隣永言配命唯晉之鎮

其三

厥鎮伊何實幹心膂文教內輔武功外禦淮方  
未靖帝曰攸序公乎出征奄有南浦

其四

南海旣賓爰戢干戈桃林釋駕天馬婆娑象齒  
南金來格皇家絕音協徽宇宙告和

其六

玄綱峻極天罔旣紘  
武方升允茲兼弘  
義義高夏有肅其涼  
公侯戾止駟驥龍驤  
善問如林在會鏘鏘  
祝融銜節火正緝熙  
凱風徘徊萬物欣時  
秩秩初筵薄言在茲  
嘉福介祐萬壽無期  
大將軍宴會被命作此詩

皇皇帝祐誕隆駿命  
四祖正家天祿保定  
叡摺惟晉世有明聖  
如彼日月萬景攸正

其二

巍巍明聖道隆自天  
則分明喪觀象洞玄  
凌風

叶極絕輝照淵肅雍往播福祿來臻

其三

在晉奸臣稱亂紫微神風潛駭有赫茲威靈旗  
樹旆如電斯揮致天之屆于河之沂有命再集  
皇輿凱歸

其四

頽綱旣振品物咸秩神道見素遺華反質辰壯  
重光協風應律函夏無塵海外有謚

其五

芒芒宇宙天地交泰王在華堂式宴嘉會玄輝

峻朗翠華崇藹冕弁振纓藻服垂帶

其六

祁祁臣僚有來雍雍薄言載考承顏下風  
嘉客仰瞻玉容施巴唯約于禮斯豐天錫難老  
如岳之崇

太尉王公以九錫命大將軍讓公將還  
京邑祖餞贈此詩

列文辟公時惟哲王闡縱絕期平顯幽光內實  
慎徽緝熙有臧出紂方慝間督不揚高山峻極  
天造芒芒

其二

天子念功大典光備肅肅王命宰臣莅事穆矣  
淵讓遺功遂志思我遠猷德音孰嗣

其三

后命旣靈王人反旆興言出祖飲餞于邁冷旒  
泱泱軺軒藹藹和風弭塵清暉映蓋

其四

思樂中陵言觀其川公王戾止有車麟麟伊誰  
云饗我有嘉賓羽觴舉酬酢爾征人

其五

悠悠征人四牡駢駢發軫北京振策紫微昔乃  
云來春林方輝歲亦暮止之子言歸道途興戀  
伏載稱

其六

聖澤旣渥嘉會愔愔庭旅鍾鼓堂有瑟琴飛轡  
清暉扶桑移蔭視景祗慕揮袂沾襟變彼同栖  
悲爾異林我有旨酒以歌以吟

大安二年夏四月大將軍出祖王羊二  
公於城南堂皇被命作此詩

時文唯晉天祚有祥聖宰作弼受言旣臧有赫



斯庸勲格昊蒼景物台暉棟隆玉堂

其二

惟常思庸大興光迪聖敬遠濟神道玄邈思媚  
三靈誕膺天篤嘉命旣辱王人言告

其三

翼翼主人言告惟慕公輿駕言乃眷斯顧華旌  
飛藻鳴鸞振路駢駢駟牡嗟天載步

其四

我有高夏如雲斯薈彫軒戾止薄言嘉會問誰  
在宴惟俊惟乂豐俎啟薦獻酬交泰

其五

攸攸昊天南正興言  
朱明有晔萬葉翠繁  
昌雲垂天凱風熙顏  
王臣在此貽宴于懽

其六

懸象西頽虞淵納景  
嘉樂未晞駕已整行  
矣征人身垂路永飛  
駮顧懷華蟬引領遺  
思北京結轡臺省

贈顧驃騎後二首

有皇美祈陽也祈陽  
秉文之士駿發其聲  
故能明照有吳入顯  
乎晉國人美之故作  
是詩焉

有皇大晉時文憲章規天有光矩地無疆神篤  
斯祐本顯克昌載生之雋實惟祈陽哲問宣猷  
考茂其相

其二

於鑠祈陽誕鍾天篤清輝龍見玄猷淵嘿沉機  
響駭幽神廣覲和以同人歸物時育有大惡盈  
謙以自牧思我懿範萬物來服

其三

吳未喪師天秩有庸淵哉若人弱冠休風俯翼  
黃門以德來忠端秀蕃后正色儲宮徵音鑠穎

邈矣遐踪

其四

皇維南終舊邦匪歆委弁釋位如龍之潛考槃  
窈谷假樂豐林子雖藏器鍾鼓有音惠風往敬  
慶問來尋

其五

濟濟元公相惟天子明明辟王思隆多士帝曰  
欽哉有命集止我咨四方令問在爾以朕大賚  
乃膺嘉祉聿來胥步觀國之紀

其六

惟皇建極緝熙清曜我有畀民明德來照大觀  
在上主假有廟顯允顧生金聲玉振之子于升  
利見大人龍輝絕跡有肅清塵

其七

清塵旣彰朝虛好爵敬子侯度慎徽百辟予聞  
有命德禮不易嗟我懷人瞻言永錫豐祐東法  
惟子之績

其八

遵泫涉泗言告同征勁風宵烈湛露朝零雪垂  
謁下泉冽清冷哀哉行人感物傷情從子京邑

言觀厥成天保祚德式穀以寧

思文美祁陽也祈陽能明其德刑于寡妻以至  
于家邦無思不服亦賴賢妃貞女以成其內教  
故作是詩焉

思文祁陽祁陽克峻天錫淳嘏宣茲義問德音  
既烈海外有奮既奮斯音祇敬厥德照治其家  
覃及邦國永肇儀刑俾民惟則

其二

文王在上太姒思齊魯侯克昌亦賴令妻鑿神  
有顧蘋繁在斯祁陽載天作之伉儷

其三

在虞之胄實惟有姚穎艷玉秀華茂桃夭居顯  
祇明在靈格幽清塵熠爍淑心綢繆爰及祁陽  
惟德之周

其四

其德伊何和貞虔告師民履素言謀慮度鐘鼓  
思樂靖端夙效考休攸嬪來嫁于顧

其五

羔羊執贄玉帛有輝西兩集止之子于歸宗姻  
風從娣姪雲回祁陽顧之煥其盈闈

其六

旣日歸止式揚好音言觀河洲有集于林思樂  
葛藟薄采其蕈疾皮攸遂乃孚惠心

其七

惠心旣孚有恪中饋敦此衆斯永錫嗣類載延  
窈窕用和寤寐神之聽之胤祚來爾

其八

昔周之隆有姒如有內刑聖敬外崇多士今我  
淑人實亮君子亶亶翼翼亦繼斯祉宜爾子孫  
福祿盈止



從事中郎張彥明爲中護軍

并敘

奚世都爲汲郡太守客將之官大將軍崇賢之  
德旣遠而厚下之恩又隆非此離析有感聖皇  
旣蒙引見又宴于後園感鹿鳴之宴樂詠魚藻  
之凱歌而作是詩

思文有聖叡摅配天功濟生黎道合上玄休命  
發揮有集惟賢摅彼寤宿澄此在淵

其二

濟濟多士實播令聞王曰欽哉余嘉乃勳徽音  
孔碩惠爾風雲穆此芳烈肇揚清芬

其三

肅肅庶僚袷服寵暉肇被桃虫假翼翻飛出撫  
邦家入翔紫微有命旣集願言永違

其四

思樂華堂雲構崇基公王有酒薄言饗之景曜  
徽芒芳風詠時宴爾賓儉具樂于茲

其五

疊疊我王豐恩允藏我客戾止飲酒公堂自彼  
下僚聿來有光悲矣永言指塗逝將形違殿闈  
景附華房

其六

開國承家勿用小人今我聖宰實蕃斯仁凌淵  
龍躍披林鳳振正直旣好嘉禮陳振我遠德  
歸于時民

贈汲郡太守

於穆皇晉豪彥實蕃天罔振維有聖貞觀鳴鳥  
在林良駿即閑萃俊又時亮庶官

其二

抑抑奚生天篤其淳藝穎蘭揮瓊光玉振沉機  
照物妙思考神思我善問觀德古人

其三

善問伊何惠音孔韶肇允衡門翻飛宰朝肅雍  
芳林芬響凌霄穆矣和風育爾清休

其四

亦既有試出宰邦家之子于行民固謳歌風澄  
俗儉化靜世波芒芒旣庶且樂于和

其五

我有好爵旣成爾服入贊崇華遂登帷幄時文  
聖宰天祚方穀朔風徽止鴻漸雲嶽

其六

悠悠斯民三代直道我求明德惟奚攸考緝熙  
暉章天祿來保惠心無兢豐化有造

其七

樂只君子茂德攸綏嗟我懷人式是言歸聿言  
來集如翼斯揮日予不惠照爾清暉

其八

職思旣殊亦各有司念我同僚悲爾異事之子  
之遠悠悠我思雖無贈之歌以言志

陸士龍集卷二

陸士龍集卷三

兄平原贈 并序

余弱年夙孤與弟士龍銜卹喪庭續會逼王命  
墨經即戎時並繁髮悼心告別漸歷八載家邦  
顛覆凡厥同生彫落殆半收迹之日感物興哀  
而龍又先在四時迫當祖載二昆不容逍遙銜  
痛東徂遺情西暮故作是詩以寄其哀苦焉  
於穆予宗稟精東嶽誕育祖考造我南國南國  
克靖實繇洪績惟帝念功載繁其錫其錫惟何  
玄冕衮衣金石假樂旄鉞授威匪威是信稱平

遠德奕世台衡扶帝紫極

其二

駕生三昆克明克俊遵塗結轍承風襲問帝曰  
欽哉纂戎裂袞雙組式帶綬章載路即命荆楚  
對揚休顧肇敏厥績武功聿舉烟煴芳素綢繆  
江許昊天不吊胡寧棄予

其三

嗟予人斯胡德之微闕彼遺軌則此頑違王事  
匪監於旃屢振委籍舊戈統厥征人祈祈征人  
載肅載閑駉駉戎馬有  
有翰昔予翼考惟斯

伊撫今予小子繆尋末緒

其四

有命自天崇替靡常玉師乘運席江卷湘雖  
守守從武臣守局下列譬彼飛塵洪波雷擊  
與衆同浪巔跋西夏收迹舊京俯慙堂構仰懷  
先靈孰云忍媿寄之我情

其五

伊我俊弟咨爾士龍懷襲瑰瑋播殖清風非德  
莫勲非道莫弘垂翼東畿耀穎名邦綿綿洪統  
非爾孰崇依依同生恩篤情結義存並濟胡樂



之悅願爾偕老携手黃髮

其六

昔我西征扼腕川湄掩涕即路耀袂長辭六龍  
促節逝不我待自往迄茲曠年八祀悠悠我思  
非爾焉在昔並垂髮今也將老銜哀茹感契闊  
克飽嗟我人斯胡卹之早

其七

天步多艱性命難誓常懼隕斃孤魂殊裔存不  
阜物沒不增壤生若朝風死猶絕景視彼浮遊  
方之僑客眷此黃廬譬之斃宅匪身是去亮會

伊惜其惜伊何言紆其思其思伊何悲彼曠載

其八

出車戒塗言告言歸辱食驚駕夙與宵馳濛雨  
之陰炤月之輝陸陵峻坂川越洪漪爰屆爰止  
步彼高堂失爾羽邁良願中荒我心永懷匪悅  
匪康

其九

昔我斯逝兄弟孔仁今我來思或彫或疚昔我  
斯逝族有餘榮今我來思堂有哀聲我行其道  
鞠爲茂草我履其房物存人亡拊膺涕泣血淚

彷徨

其十

企佇朔路言爾歸心存言冥目想容輝迫彼  
窀穸載驅東路繼其桑梓肆力丘墓媿兮變兮  
興懷罔極眷言顧之使我心惻

答

伊我世族太極降精昔在上代軒虞篤生厥生  
伊何流祚萬齡南嶽有神乃降厥靈誕鍾祖考  
徹茲神明運步玉衡御和太清賓御四門旁穆  
紫庭紫庭旣穆威聲爰振厥振伊何播化殊鄰

清風攸被率土歸仁彤弧所彎萬里無塵功昭  
王府帝庸厥勲黃鉞授征錫命頻繁闐如虓虎  
肅茲三軍光若辰時亮彼公門仍世上司芳流  
慶純雲和所產爰育二昆誕豐岐嶷夙邁令問  
令問伊何休音允臧先公克構乃崇斯堂耀穎  
上京發迹扶桑戎車山征時惟鷹揚鷹揚旣昭  
勲庸克邁天子命我鎮弼于外在作扞城以表  
南裔降災匪蠲景命顛沛惟我賢昆天姿秀生  
含竒播殊明德惟馨太陽散氣乃稟厥和山川  
垂度爰則厥遐厥遐伊何惟光惟大惟大伊何

如岱如渭恢此廣淵廓彼洪懿弘道惇德淵哉  
爲器統我先基弱冠慷慨將弘祖業實崇奕世  
咨予頑蒙蕞爾弱才沉耀玄渚挹庇雲淇陶化  
靡移固陋于茲瞻仰洪範實忝先基巍巍先基  
重規累構赫赫重光遐風激鷺昔我先公爰造  
斯猷今我六蔽匪崇克扶悠悠大道載邈載遐  
洋洋淵源如海如河昔我先公斯綱斯絕今我  
未嗣乃傾乃圯世業之頽自予小子仰愧靈丘  
街憂沒齒憂懷惟何顛景惟塵我我高蹤眇眇  
質辰明德繼體莫非哲人今我頑鄙規範靡遵

仍世載德荒之予身莫峻匪岳有俊斯登莫高  
匪雲有高斯凌矧我感基匪克階升玄黃長坂  
載寐載興豈敢憚行哀此負乘芒芒高山自予  
頽之濟濟德義匪予懷之終銜永負于其媿而  
昔予言曠汜舟東川銜憂告辭揮淚海濱義陽  
趣駕炎華電征自我不見邈哉八齡悠思迥望  
寤言通靈昔我往矣辰在東嶠今我于茲日薄  
桑榆銜艱遘愍困瘁殷憂哀矣我世匪蒙靈休  
開元迄茲震興迭微弱風隱駭海水群飛王旅  
南征闡耀靈威予昆乃播爰集朔土載離永久

其毒太苦上帝休命駕言其歸多我邁愍振蕩  
朔垂羈繫殊俗初願用違巖駕東征肅邁林野  
夕秣乘馬朝整僕旅矯矯乘馬載驅載馳漫漫  
長路或降或階晨風夙零朝不皇飢傾景儵墜  
夕不存罷雖有豐草匪釋奔駟雖有重陰匪遑  
假寐煢煢僕夫悠悠遄征經彼喬木有鳥嚶鳴  
微物識儕矧伊有情樂茲棠棣實歡友生既至  
既覲滯思曠年曠年殊  
覲未浹辰恨其永懷  
憂心孔艱天地永久命也難長生民忽霍曷去  
其常我之既存靡績靡紀乾坤難並寂焉其已

生若電激沒若川征存愧松柏逝慙生靈匪吝  
性命實悼徒生苟克撫新豈憚冥冥瞻企皇極  
徼福上天冀我友生要期永年昔我先公邦國  
攸興今我家道綿綿莫承昔我昆弟如鸞如龍  
今我友生凋俊隊雄家哲永徂世業長終華堂  
傾構廣宅頽墉高門降衡脩庭樹蓬感物悲懷  
愴矣其傷惇仁汜愛錫予好音晞光懷寶煥若  
南金披華玩藻華若翰林詠彼清聲被之瑟琴  
味此殊響慰之予心弘懿忘鄙命之反覆敢投  
桃李以報寶玉冀憑光蓋編諸末錄



贈鄭曼季往返八首

谷風懷思也君子在野愛而不見故作是詩言其懷思之也

習習谷風扇此暮春玄澤墜潤靈爽烟熅高山熾景喬木興繁蘭波清踴芳澣增涼感物興想念我懷人

其二

習習谷風載穆其音流瑩鼓物清塵拂林霖雨嘉播有滄淒陰歸鴻逝美玄鳥來吟嗟我懷人其居樂潛明發有想如結予心

其三

習習谷風以溫以涼玄黃交泰品物含章潛介  
淵躍候鳥雲翔嗟我懷人在津之梁明發有思  
凌彼褰裳

其四

習習谷風其集惟高嗟我懷人於焉逍遙鸞栖  
高岡耳想雲韶拊翼墜夕和鳴興朝我之思之  
言懷其休

其五

習習谷風其音孔嘉所謂伊人在谷之阿虎質

山嘯龍輝淵蟠維南有箕匪依其和有球斯畢  
戢爾滂沲懿厥河漢惟彼大華明發有懷我勞  
如何

鄭答

鴛鴦美賢也有賢者二人雙飛東岳揚輝上京  
其兄已顯登得朝而弟中漸婆娑衡門然其勞  
謙接士吐握待賢雖姬公之下白屋洙泗之養  
三千無以過也乃肯垂顧惠我好音思樂結永  
好之懽云爾

鴛鴦于飛在江之涘和音反暢拊翼雙起朝遊

蘭池夕宿蘭芷清風翕習扇彼蘭蒨凌雲高厲  
載翔載止

其二

鴛鴦于飛載飛載吟有鬱浚藪實惟桂林芳條  
高茂華繁垂陰爰翔爰憩其南有馥清芬  
協我好音

其三

鴛鴦于飛乘雲高翔有嚶其友戢翼未翔澹淡  
素波容與趨倡雖曰戢止和音遠揚我有好爵  
與子偕嘗

其四

鴛鴦于飛徘徊翩翩載頡頏命侶鳴群有鬱  
蘭臯冽彼清源駕言遊之聊樂我云思與佳人  
齊懽順川

其五

鴛鴦于飛或飛或遊習習谷風扇彼清流春草  
揚翹黿龜沉浮感物興想我心長憂誰謂河廣  
曾不容舟企予望之搔首踟躕

其六

鴛鴦于飛載和其鳴懷爾好音寡我中情人亦

有言心得遺形授我木瓜報爾瑤瓊匪繫日報  
永好千齡

陸贈

鳴鶴美君子也太平之世君子猶有退而窮居  
者樂天知命無憂無欲碩人之考繁傷有德之  
遺世故作是詩也

鳴鶴在陰戢其左翼肅雍和鳴在川之側假樂  
君子詐爾明德思樂重虛歸于其極嗟我懷人  
惟馨黍稷

其二

鳴鶴在陰其鳴喈喈垂翼蘭沼濯清芳池假樂  
君子其茂猗猗底之瑰寶有粲瓊瓌乃振聚裳  
襲爾好衣嗟我懷人啓襟以晞

其三

鳴鶴在陰其儀藹藹謂天盖高和音于邁假樂  
君子篤膺俊乂穆風潛烈興雲戢蒼德茂當年  
時衍嘉會安得肇藻改爾綰帶嗟我懷人心焉  
忱愾

其四

鳴鶴在陰載好其聲漸陸儀羽遵渚回涇假樂

君子祚之篤生德耀有穆如瑤如瓊安得風帆  
深濯髯滅景遺雲雨爾在北冥嗟我懷人惟用  
傷情

鄭答

蘭林懽至好也有君子世濟其美英名光茂遭  
時暫否福德衡門顧我慙懃屢辱德音思與結  
好以永不刊

瞻彼蘭林有翹有秀有斐君子邦之碩茂厥德  
伊何固天攸授如川之源如山之富回流清淵  
啓襟開裕縉紳晞風民用胥附



其二

猗猗碩人如玉如金浚其明  
括尅廣德心習習  
凱風吹我棘林飛鴉萃至允  
懷好音悠悠征徒  
輶德鮮任嗟我猗人和樂實  
忱

其三

在昔延州鵠鳴江涯今我陸  
子曠世繼竒身垂  
千載德音並馳漸鷓遵渚宛  
其羽儀安得高風  
騰翮天池

其四

飛龍蜿蜒山谷升氣猛虎嘯  
吟清風高厲情同

來感數垂身逝夷鮑齊權專名故世愷悌君子  
民之攸憇咨予違時下載同愛

其五

垂龔之會匪詩不宣嗟我懷人斯恩斯勤德音  
來訊有蔚其文菽菽憊鬼匪迹不存誠在心德  
愛結忘言

陸贈

南衡美君子也言君子邈世不悶以德存身作  
者思其以德來仕又願言就之宿憾白駒之義  
而作是詩焉

南衡惟岳峻極昊蒼瞻彼江湘惟水泱泱清和有合俊又以藏天保定爾茂以瓊光景秀濛汜頽逸扶桑我之懷矣休音俊揚

其二

穆穆休音有來爾雍沉波涌奧淵芳馥風僚虛養恬照日遺蹤考槃遵渚思樂潛龍我之懷矣冥爾華宮

其三

和璧在山荆林玉潤之子于潛清輝遠振克稱輔德作寶有晉和聲在林羽儀未變我之懷矣

有客來信

其四

風雲有作應通山淵清琴故彈宮商乘絃類族  
知感有命自天夷叔希世猶謂比肩矧我與子  
姤會斯年

其五

我之懷矣在彼北林北林何有於煥斯文瓊瑰  
非寶尺牘成珍豐華非妙得意惟神河魴登俎  
遺答清川

鄭答

南山酬至德也有退任衡門修道以養和棄物  
以存神民思其治士懷其德或思置之列位或  
思從之信宿詩人嘉與此賢當年相遇又屢獲  
德音情懽心至故作是詩焉

陟彼南山言采其蕭樂只君子邦家之翹克茂  
厥猶輔德是收聊道以儉廣愛以周嗟我懷人  
永好千秋

其二

瞻彼江潭言釣其鱣有美碩人自公退處羔裘  
逍遙輔德是舉白駒遯時世事孰與思我猗人

寘之晉序有客信信獨寐寤語

其三

天高地卑玄黃烟熅人道交泰自昔先民耽文  
合好輔德與仁管叔罕僑曠世難鄰修組施結  
玄弁生塵咨我與子遘會當身琴瑟在御永愛

纏綿

其四

瞻彼江澳言詠其潭所謂伊人在水之陰養和  
以泰樂道之潛錦衣尚絅至樂是耽興言永思  
繫懷所欽愛而不見獨寐寤吟

其五

詩以言志先民是經乃惠嘉訊德音惟馨欽詠  
繁藻永結中情華文傷實世士所營達人神化  
反之混冥交棄其數言取其誠思與哲人獨寶  
其貞

陸贈

瞻彼高崗有猗其桐允也君子實寶南江員規  
啓俗沉矩履方沫此明流清瀾川通陟彼衡林  
味其回芳

其二

馥馥回芳綢繆中原祁祁庶類薄采其芬栖遲  
泌丘容與衡門聲播東汜響溢南雲

其三

穆穆閭闔南端啓籥庶明以庸帝聽式闕有鳳  
于潜在林栖翮非予之祚孰與好爵

其四

幽居玩物顧景自頤發憤潛惟佶彿有思予美  
忘此終然胥來企予與言惟用作詩

鄭答

瞻彼中陵蘭黃猗猗允矣君子樂且有儀沉仁



育物玄聰鏡機德充闡庭名逸南畿  
衿衿俊友言酌言依

其二

鼓鍾于宮百里震聲疊疊令問歸我  
偉貞厥震伊何駿奔以驚厥問伊何  
民胥以寧有鶴在陰非子誰鳴我有  
好爵非子孰盈

其三

潛龍遁初有鳳戢翬王猶未泰彝倫  
錯違臯門重爾啓扉庶績罔斁非爾  
焉綏翼翼京宇侯爾攸晞民之胥望  
如渴如飢

其四

德音來惠覆玩三周  
泥潤淵洞逸藻雲浮  
結心所親曷變曷渝  
路隔津梁一葦限殊  
終朝之思三秋是踰  
愛而不見與言踟躕

贈顧尚書

五嶽降神四瀆炳靈  
兩儀鈞陶參和大成  
兆光人倫誕育至英  
於顯尚書實惟我兄  
行成世則才爲時生  
體道旣弘大德允明  
厥弘伊何靡曠不遵  
厥明伊何靡妙不研  
無索炤灼有冰幽玄  
細微不錯毫芒以陳  
積篲爲山納流成淵  
扶翹

布華養物作春所肅以禮所潤以仁宣質拔行  
曜文入采堅不可鑽清如凝水方迹迎服蹈齊  
闕里晞聖而惟亦顧之子彼棄芝英玩此蘭茝  
異世同芳其馥不已我蘭旣馥我風載清能芬  
南岳運芳北征子有其德人求其馨逝此陋巷  
薰彼紫庭厥音不已鼓鐘有聲聞天之聰譬之  
鵠鳴天聰旣招我實惟彰乘風之鳳眷言朝陽  
披雲藻綉來此舊鄉謙光自抑厥輝愈揚麗容  
雕翕孔好已張旣照乎林且我華英華英已曜  
餘光難延曾淺別速哀以紹欣追曠同塗暫和

笑言殊音合奏曲異響連絕我懽條統我思因  
根分來在愛感往思非形景有處有遊載離  
載會且懽且憂感彼遠曠矣此延娛樂奏聲哀  
言發涕流唯願我子德與福俱亦天之祐亦我  
之

贈顧彥先

玄黃挺秀誕授至真行該其高德備其新先塋  
同珍騰都之龍鳳合塵

其二

皇皇明哲應期繼聲華映殊域實鎮天庭入輔

出輔乾乾靡寧夏發涼臺我雨我暑冬違邦族  
風霜是處嗟彼獨宿誰與晤語飄飄艱辛非禹  
孰舉言念君子悵惟心楚

其三

悠悠山川駢駢征遐陟升嶠堯降涉洪波言無  
不利乘嶮而嘉人懷思慮我保其和

其四

邂逅相遇良願乃從不逢知己誰濟予躬莫攀  
莫附媿我高風時過年邁晷冉桑榆晞先賴潤  
亦在斯須假我夷塗頓不忘驅汜予津川桴不

失浮無愛餘輝遂暗東嶠

其五

幽幽東嶠戀彼西歸瞻儀情感聆音心悲之子  
于邁夙夜京畿王事多難仲焉徘徊

答顧秀才

芒芒上玄有物有則厥初造命立我藝則爰茲  
族類有覺先識斯文未喪誕育明德

其二

允矣顧生載靈之和沉根芳沼濯秀蘭波淵翹  
戢穎景茂凌華惟是德心是用閑邪

其三

德心伊何行歸于周晞高仰峻企遠懷悠匪願  
在明靡倦斯幽凡我同朋瞻言清休

其四

慎終于遠俾民歸厚言若有行及予携手何以  
恤我其仁孔有心之云愛隆敬其久

其五

既邁斯仁亦迪茲文藻不雕樸華不變淳有斐  
君子如珪如璠仰欽德類依懷惠詮式揚好問  
邦家于宣

答大將軍祭酒顧令文

惟林有鸞惟淵有螭顯允明德實邦之基先后  
陟恪子配于茲遵彼玉堂受言藎之

其二

中原有軌世鮮克蹈先民有懷子探其妙心猶  
水鑿函景內照名若振炎攄光外耀

其三

相彼水鑿民胥攸臨矧曰明德人誰弗欽寫我  
朶頤卽爾澄心義隆自古好邈在今

其四



大人有祚興雲自天之子于升亦躍于淵景曳  
清霄響發鳴弦義問弘集淑風載鮮

其五

企予朔都非子孰念豈無弱翰才不克瞻惠音  
聿來瓊華玉艷無德不報念辭惟忝

答吳王上將顧處微

邈矣大昧造化明明物以曲全人以直生類聚  
百族群分萬形員淵挺隨方川吐瓊

其二

諠諠洪族天祿攸蕃神綏厥本道裕其源條有

豐葉波無輟瀾烈風時播芳響世繁

其三

日繁曰熙載德于茲克文克敏乃惠乃慈遵彼  
洪流薄言詠之好是神契聊與之期

其四

仁勇同宅文武相紛王謂御事誰撫上軍於時  
翻飛虎嘯江濱式遏不虞俾也無塵

其五

三代既遠直道垂音非齒焉尚非德孰欽鑽仰  
自古鮮曰在今匪唯形文殷薦其心

其六

心以殷薦分以道成祇服惠顧疇此深清亦有  
芳訊薄載其誠豈無春暉茲焉可榮

其七

大道易聞崇軌難襲孰云匪衍咎吝尤集敢謝  
不佞栖山自戢臨篇焉愧德輶辭輯

其八

翩彼日月逝猶駭電朝華未厭夕風已扇詩亦  
有悲無幾相見懷德歎心于焉東眷

其九

平津晚貢貢公後徵陟彼玉階黃髮來升靈卉  
三秀芳草秋興唯願瀆神福祿是膺

贈鄱陽府君張仲膺

神林何有竒華妙實皇朝如何窮文極質斌斌  
君子升堂入室太上有矐子誕其輝知機日難  
子達其微入輔幃幄出御千里滔滔江漢南國  
之紀

其二

謁帝東堂剖符南征天子命我車服以榮何以  
潤之德被蒼生何以濟之威振群城却愚以化

崇賢以仁鳳舒其翮龍濯其鱗憶彼荒藪莫敢  
不賓雖云舊邦其命惟新

其三

卞和南金終始一色顯允君子窮達一德弘仁  
厲道物究其極古賢受爵循墻虎恭今哲居貴  
履盈如冲接新以化愛舊以豐隆此嚶鳴惇彼  
谷風

其四

忠至寵加孝至榮集內崇南芬外清名邑煒煒  
棠棣賈增其華猗猗桑梓厥耀孔多被繡畫行

昔人攸羨階雲飛藻孰與同祭

其五

人道伊何難合易離會如升峻別如順淇嗟我  
懷人曷云其來貢言執手涕既隕之

孫顯世贈

五龍戢號雲鳥纂紀淳化旣離義風肅始軒冕  
垂容文教乃理奕奕英族盛德豐祀

其二

於赫皇吳應天統元蒸文烈公光讚懿勳九命  
重輝恭德彌勤華黻襲藻金石載振

其三

淵哉陸生本顯洪胄亦崇懿風邈比弘裕無競  
惟德豐光伊茂文以義好施以仁富

其四

山積惟峻道隆名遐潛景在淵龍躍承華旣升  
爾儀誰不允嘉有漙重深載清其波

其五

濟濟皇朝裁裁髦士序爵以賢惟俊萃止翩翩  
二官令問不已乃遷蘇閣皇典斯紀

其六

思文大謨恢我王猷清風肆穆雅憲允休邁彼  
江川邈此北流微言蘭馥玉藻雲浮

其七

遭時之險虎宰滔天憑德羨重絜此俊賢休否  
既亨名以德淵清微伊鑠鑠之彌堅

其八

明明大象玄鑒照微顯允君子求福不回善挹  
引慶險以德祈澄濁以靜罔久不暉

其九

釋彼遊寄樂此窈貞形以神和思以道新清雲



方乘芳餌可捐達觀在一萬物自賓

其十

寂寂重門誰和子音瞻彼晨風思託茂林

答

邈矣上祖垂休萬葉廣問弘被崇軌峻躡高山  
克荒大川利涉繁藹惟祐風連雲接

其二

大人有作二后利見九功敷奏七德殷薦鼎寶  
重芳勞烈再扇奕世弘道天祿來宴

其三

道弘振古祚未替今如彼在川亦有浮沉大韶  
既素響非我音豈曰蔬止塗弗克尋

其四

昌風改物豐水易瀾百川總紀四海合源在彼  
焉取聿來莫觀曾是徧心敢忘丘園

其五

員暉偏照玄澤謬盈發彼承華頓此增城記景  
靈雲倦遊紫庭匪曰能知寔忝長嬰

其六

煥矣金虎襲我皇猷孰云匪吝仰媿蒼流往蹇

來反弭迹一丘變彼東朝言即爾謀

其七

振振孫子洪族之紀志擬龍潛德配麟趾引服  
朗節克明峻軌遵彼中臯於穆不已

其八

於穆不已大都是階之子于命民應如隕厚德  
時邁協風允諧惠此海湄俾也可懷

其九

乃眷丘林樂哉河曲鱗紱披褐投即懷玉遺情  
春臺託蔭寒木言念伊人溫其在谷

其十

道俟人行辭以義輯和容過表余未云執惠音  
弘播清風駿集懷德形懽臨篇景立

失題二首

美哉良友稟德坤靈明照遠鑒幽微研精超跡  
皇英質如瑤瓊贈我翰林示我丹誠道同契合  
體異心弁自頃西徂合于五樓遲想歡嫌觀我  
良疇亦既至止願言莫由室邇入隔中情則憂  
抱恨東遊神往形留何以合忍寄之此詩何以  
寫思記之斯辭我心愛矣歌以贈之無祕爾音

不我是貽有美人人芳問芬葩嗟我欽羨夢想  
光華亦既至思上下欣嘉德馥秋蘭容茂春羅  
淑似令姊惟予陋何雖有良友朽木難加愛樂  
朋規贈以斯歌皆能載之其美孔多嗟痛薄枯  
並懼哀苦堂構既崩過庭莫覩我悴西隣子沉  
東土契闊艱辛誰與晤語身滯情往神逝影處  
發夢宵寐以慰延佇

陸士龍集卷三

陸士龍集卷四

答兄平原二首

悠悠塗可極，別促怨會長。銜思戀行邁，興言在  
臨觴。南津有絕濟，北渚無河梁。神往同逝感，形  
留悲參商。衡軌若殊迹，牽牛非服箱。

行矣怨路長，怒焉傷別促。指途悲有餘，臨觴歡  
不足。我若西流水，子如東峙嶽。慷慨逝言感，徘徊  
居情育。安行携手俱，契闊成腓服。

爲顧彥先贈婦四首

我在三川陽，子居五湖陰。山海一何曠，譬彼飛

與沉目想清慧姿耳存淑媚音獨寐多遠念寤  
言撫空杵彼美同懷子非爾誰爲心

悠悠君行邁  
皜皜妾獨止  
山河安可踰  
永路隔  
萬里京室多妖冶  
粲粲都人子  
雅步擢纖腰  
巧笑發皓齒  
佳麗良可美  
衰賤焉足紀  
遠蒙眷顧  
言銜恩非望  
始翩翩飛蓬  
止郁郁寒水  
縈遊止  
固殊性浮沉  
豈一情隆愛  
結在昔信誓  
貫三靈  
秉心金石固  
豈從時俗  
傾美日逝  
不顧纖腰  
徒盈盈何用  
結中欸仰  
瞻北辰星  
浮海難爲水  
游林難爲觀  
容色貴及時  
朝華忘日晏  
皎皎彼姝

子灼灼懷春祭西城善雅舞總章饒清彈鳴簧  
發丹唇朱絃繞素腕輕裾猶電揮雙袂如霧散  
華容溢藻幄哀音入雲漢知音世所希非君誰  
能讚棄置北辰星問此玄龍煥時暮復何言華  
落理必賤

答張士然一首

行邁越長川飄飄冒風塵  
通波激江渚悲風薄丘榛  
脩路無窮迹井邑自相循  
百城各異俗千室非良隣  
歡舊難假合風土豈虛親  
感念桑梓域鬢髯眼中人  
靡靡日夜遠眷眷懷苦辛



芙蓉

綠房含青實金條懸白璆俯仰隨風傾燁燁照  
清流

嘯

逍遙近南畔長嘯作悲歎

陸士龍集卷四